

Gwendeline van Trikt-Rojer a bira Regional Director 2018-2020 pa Quota International Region 10



ORANJESTAD(AAN)— Recientemente, Quota International Inc. a tene nan Reunion Annual pa Region 10 cu a tuma lugar na Landgoed Zonheuvel Doorn, Hulanda y como Regional Director 2108-2020, di Region 10 a keda nomina y eligi den persona di Sra. Gwendeline van Trikt-Rojer di Quota International Aruba. Gwendeline van Trikt-Rojer ta un miembro activo di Quota desde 2011 y a ocupa diferente puestonan den Quota International Aruba su directiva, entre otro, Director di Development & Growth 2013-2014, Director di Service Projects 2014-2015, Vice-Presidente 2015-2016 y Presidente di 2016-2017.

Durante e reunion aki, tur Quota Club di Region 10 a encontra cu otro y hunto ta eligi un Regional Director nobo, cual function ta encera e tarea pa representa Quota International Inc pa dos aña consecutivo y tin cu lidera y supervisa e Region. Alavez e meta di e reunion annual aki ta pa intercambia ideanan pa proyectonan na beneficio di comunidad y pa sigui enforza e metanan di e organizacion. Un total di 60 miembro a participa.

Region 10 di Quota International Inc. ta consisti di e siguiente Quota Clubnan: Quota International of Aruba, Quota International of Curacao, Quota International of Curacao Silver, Quota International of St. Eustatius, Quota International of Trinidad & Tobago, Quota International of Suriname, Quota International of Amsterdam-Hulanda, Quota International of Rotterdam-Hulanda y Quota International of Zeist-Hulanda.

Presente tambe na e reunion importante aki tabata Presidente di Quota International Inc. Sra. Marie Dopson-Dunlop, kende a biaha especial for di Canada pa Hulanda pa atende e reunion aki.

Durante e parti di celebracion, Presidente di Quota International Inc., Sra. Marie Dopson-Dunlop conhuntamente cu Regional Director, Region 10- Saliente, Sra. Valentina Cijntje-

Engelhardt a haci e acto ceremonial oficial y anuncia cu e Regional Director 2018-2020 pa Region 10 ta Sra. Gwendeline van Trikt-Rojer. Quota International Inc. ta un organizacion internacional di servicio consistiendo solamente di hende muher ehecutivo cu ta traha voluntariamente pa yuda instancianan cu ta traha cu personanan cu limitacion di oido, hende muhe y muchanan den situacionnan di abuso y esnan mas vulnerabel den nos comunidad.

Quota International Inc. ta na vispera pa cumpli 100 anja di existencia y ta consisti di 21 Region International reparti full rond mundo. Cada Region tin nan Regional Director cu ta representa nan internacionalmente na e Quota Clubnan corespondiente di nan Region.

Quota International Inc. su meta ta pa contribui cu e desaroyo positivo den comunidad local y internacional.

Quota ta aporta na conscientiza y educa nos comunidad cuminsando for di nos muchanan por medio di nan proyectonan annual den diferente categoria cu ta cai bow di locual cu Quota International Inc. ta dedica na dje y ta lo siguiente: esnan cu Deficiencia di Oido y Habla; Esnan cu ta mas vulnerable den nos comunidad, esta Hende muhernan den dificultad, muchanan, hobennan y nos grandinan; Esnan desafortuna cu limitacion incapacita social y fisico; Conscientisacion y desaroyo di formacion intelectual di nos muchanan y hobennan, na nivel local, internacional; y alavez pa contribui y aporta positivamente na e cuidu di esnan cu ta sufrir di e enfermedad cancer.

Durante henter aña ta organiza eventonan, seminario y campananan pa conscientiza comunidad di e problemanan di zonido duro pa oido di hende, y tambe ta ofrece asina diferente oportunidad pa test nan oido gratis durante e siman tan conoci, "Siman di Kibra Silencio, Cuida Bo Oido."

